

GHERRARE A CHINTZU

Ammentos de gherradores


de *Sarbadoranzelu Manca*

Fut de seguru una de sas pagas maneras de che colare su tempus, de sos pitzocos sardos, fintzas a sa metade de sos annos Sessanta, paris cun sa murra. Ma su gherrare a chintzu baliat pò medire chie fut su prus forte de unu rugu de pitzocos o de sa leva; cando 'essian de leva e andian a faet sa visita (a Bilartzi sos sedilesos) isfidaian sos prus fortes de sas àteras biddas de su mandamentu.¹ Trantzia sa visita da-e custas biddas a Casteddu, sos pitzocos agatian inie àteras maneras pò s'ispassiare.²

Custa manera de gherrare dd'an torrada a bogare a pizu sos de Ollolai in su 1985, a pustis de una erica fata in bidda isoro e in sas biddas a làcana. In su 1994 est istada fundada sa "Federatzione s'Istrumpa" chi da-e su 1995 faghet parte de sa "Federazione Intemazionale di Lotte Celtiche", su matessi annu sa Federatzione s'Istrumpa est andata a sos campionaos europeos in Bretagna de Back Hold, manera de gherrare chi assimbizada meda a s'Istrumpa.³ Sos de Ollolai dda mutin Istrumpa comente in beli'e tottu sa Sardinna. Ma ite cheret narrere Istrumpa?

Segundu su Ditzionariu de sa Limba e de sa Cultura Sarda, de Mario Puddu: «Zenia de gherra chi si faghet prus che àteru pò jogu o balentia, afferrendesi s'unu cun s'àteru a chintu a bratzos faddidos e chircande de imbolare s'àteru a terra, dorchindelu, parendeli s'anca e gai; binchet chie prò fortza o prò abistesa, betada a terra cotada s'àteru a suta; chintada (lotta libera sarda)». In medas logos, istrumpu est, semper lezinde a M. Puddu⁴: «istrumpu, strumpu, istrampu: logu malu de roca, artu de uè si che podet mere (fintzas ruta a terra, istràmpidu); arrega arta de aundi s'acua de un' arriu arruit a basciu».

Agatamos s'Istrumpu de su Segnore in Villanova Monteleone, Su Strumpu de Sa Cracchera in Sini, s'Istrumpu de Mularza Noa in Bolotzana, s'Istrampu de sos Molinos tra Santulussurzu e Bonarcadu e pò torrare a nois, in Sedilo, s'Istrampu de Letundu e su 'e Lacunas. Custu apo iscritu pò fàghere a cumprere chi



A chinzu limpiu.

s'Istrumpa e su gherrare a chintzu sedilesu sun sa matessi cosa, ca 'inchiat su chi istrumpiat o istrampiat a terra s'àteru.

In Sedilo che tenimos fintzas unu gherradore, a tempus suu meda famau in bidda sua. Mauro Coccu de Bitti (ci. 1926) sedilesu da-e su 1964. Custu est su chi nos contat: «Gherriamos semper in sos cuiles e a sa recuida a bidda totus bessiana a Piatza Noa o a Piatza 'e Leone. Incue si gherriat, chentza abbaidare diferentzia de edade, zeo aia comintzau a gherrare cun sa leva de su '24. Si poniat fintzas iscomissas, semper a sa 'e tres, pò mari, a bortas pagu a bortas de prus, ma est capitau de ponnere un'arbeghe. Ma sas gherradas prus bellas fun cussas cun sas levas de sas biddas acanta. Bitti fut mandamentu e benian a tirare in leva sos de Orune, Onani, Luia e Osidda. Sos de



Sa zanga.

Omne benian a posta pò gherrare, fintzas in àteras ocasiones, benian a mgadura a pe', a bortas in sessanta-settanta. Potzo narrere chi dae sa leva de su '24 a sa 'e su '33 non m'at mai istmpau nemos; gherriamos a chintzu partziu e nos agantziamos a su tzintu o cernente andiat menzus. Sa mossa mia fut chi cando dd'artzìo batos poddighes dae terra b'iscudìo corpu de 'enurgu a sa cossa e che fut in terra."

E in Sedilo cernente si gherriada? S'arnrentu prus atesu est su de Antoni Carboni "Cardeu" chi contai cosa intesa da-e su babbu (ci. 1889) chi dd'iat intesa in muntovu: "Sos pitzocos gherraian in Partza de Cresia innanti de intrare e a sa 'essida de missa manna, bi nd'aiat unu chi mutian Su Lupu e nemos bi poniat sas palas in terra ."

Dae tando che at coiau medas annos, Peppinu Sardara (ci. 1930) nos contat: "Nos agantziamos a bratzos, onniunu comente podiat, si unu bi dda faghiat a agantzare su collete, s'àteru podiat provare a s'agantzare a su chintzu (a chintzu limpiu) e tando fut a manu 'e 'inchere. Sa manera prus zusta de gherrare fut a chintzu partziu, cund-unu bratzu suba su coddu e s'àteru suta su suirgu e sas manos chi s'azunghian in palas. Cando si 'inchiat una 'orta peròmìne, si gherriat sa 'e tres.

Zeo a bortas si mi 'etian innanti de ponnere sas palas in terra ponio sos pes in bentre a s'àteru e che ddu iscudia a tesu. M'ammentat semper de una 'orta chi cun Lenardu Melone (Freatzu) che semus pigaos gherrande dae Sa Santina fintzas a Rughes de Istrada».

De crachi annu prus zòvanu Rafaele Porcu "Pistaza" (ci. 1936) nos narat: «Si gherriat in totue, in sas carrelas e in sos cuiles, fintzas a sa una de notte. Non b'aiat medas àteras maneras pò che colare su tempus. Non b'aiat nudda de aprontau, si faiat cando nde capitaiait s'occasione, pò biere chie fut su prus forte de unu rugu de pitzocos o de una leva. Sa notte chi 'essiat sa leva noa, zughian semper su sonadore infattu, a donnia frimada a chie balliat e a chie gherriat. Cando si andiat a Bilartzi pò sa visita gherriamos centra a sos fedales de sas biddas, chi atobiaian a inie. Sas maneras de gherrare fun a bratzos e a chintzu: a bratzos si agantzian a su collete, fut raru chi tando calecunu esseret chentza zachetina e capitaiait de ti ch'abbarrare su collete in manos. In custa manera de gherrare baliat prus sa fortza chi no sa trassa, fintzas s'artària contaiait meda. A chintzu baliat prus sa trassa e-i s'ischina, in ambas duas maneras si podiat zogare de anca e de pe'. Sa manera nada a "chintzu limpiu" non dda teniamos in cussideru, ca fut in antavazu chie agantziat a primu e chie fut prus bratzi-longu; ambos duos agantzian a chintzu, ma su chi faiat innanti e lompiat a su fiancu, si fut bastante forte, a s'àteru bi faghiat mancare s'àlidu. Sa manera prus zusta de gherrare fut a "chintzu partziu", onniunu poniat unu bratzu a suba su coddu e s'àteru a suta su suirgu. Si comintziat cando ambos duos fun prontos e si podiat fàere onnia mossa de pes e de manos, calecunu cariaiat su poddìghe mannu in s'ischina, in mesu de sas palas de s'àteru e renessiat a ddu fagher calare a terra. Mi agradiat meda a gherrare a chintzu e non m'ammonto calecunu chi m'apat betau a terra».

E depiat essere aberu una manera zusta de gherrare si una pessone pitica de carena podiat betare a terra un'àtera prus arta e forte. E totu chentza regulas iscritas.

Chi sas cosas fun gasi aberu ddu cunfrimat s'àteru testimonzu, Peppinu Maronzu (ci. 1936) chi nos narat: «Fut una cosa chi si faiat de pitzinnos de deghe-dòighi annos, beli'e totus pastoredos, in sos cuiles e in sas carrelas, si gherriat a bratzos e a chintzu. A bratzos nos agantziamos a su collete e fut prus una gherra de

forza. Su prus ghemamos a chintzu, limpiu o partziu. Sos gherradores si ponian de acordu innanti, in cale manera gherrare, ca pò nàrrere, si b'aiat meda diferentzia de artària su prus bassu non bi dda faiat a abbrancare s'àtem a chintzu partziu. O solu ca unu si dda sentiat de prus in-d-una manera che in s'alerà. Sa mossa cun s'anca si nariat "sa zanga" e s'impitiat semper, si no b'aiat acordu de innanti pò nono, ma fut raru. Sas maneras de ponnere sa zanga funi varias, ma de seguru unu de sos zassos prus puntaos fut su 'enurgu, ca si tzediat cussu sa gherrada che fut binchia. B'aiat chie faiat fortza in daesegus, in s'archile, o che a mimmi faiat fortza a s'ala de fora. E chie caliat innanti a terra teniat pérdu. Zuighes, si bi nd'aiat, sos chi fun abbadiande. S'isfida prus manna fut cussa tra sos prus fortes de sas levas, a inghèriu de tres o bator'annos. Cando fui disterrau in Isvitzera tenia duos cumpanzos molisanos, chi m'aian pregontau si in Sardinna puru teniamos s'usantzia de gherrare a chintzu. Cando b'apo rispostu ca eia, at créfui provare. Amos gherrau e ddos amos binchios. Gherrian belle comente a nois».

De custas chistionadas podimos nàrrere de seguru ca s'istrumpa, sa chintada o chintzada e

sa gherra a chintzu sedileza, funi sa matessi cosa; si b'aiat diferentzias fut solu ca no esistiat regulas iscritas. Ma comente amos intesu, custu non fut unu problema, in su gherrare tra sardos e nemmancu cun zente de àteros logos: sinnu chi, fortzis, sa gherra a chintzu àteru no est che unu de sos "isport" prus antigos de sos populos de su Mediterraneu e non solu. Diat essere una cosa 'ona si sos sardos, poninde fatu a sos de Ollolai, esseren zau a custu fatu culturale-isportivu s'importu chi meritatu, chentza pò cussu disprezziare sos àteros, ma pò nos render contu chi custa puru podet essere una cosa chi aunit.

Cherzo finire cun su cumbidu, a chie guvematu sa Sardinna, de fàere sa manera chi chie si leat s'impreu de amaniare rugos de gherradores, benzat azuau, mancali fainde una leze inue si faghet sa gherra a chintzu "isport nazionale sardu".

NOTAS

- (1) Sas biddas chi funi in mandamentu de Bilartzi funi: Bidumajore, Abasanta, Norbello, Paule, Soddie, Tadasune, Boroneddu, Ardaule, Zuri, Sorradile e Bidonia.
- (2) P. FRAU: www.s'istrumpa.it
- (3) P. FRAU: www.s'istrumpa.it
- (4) M. PUDDU: Ditzionariu de sa limba e da sa cultura sarda.



A chintzu partziu.